

## Nowodhow an Seythen

11/11/08

Gwerthjiow diwosow Kambron a vynn difena korev ha sider krev.

An kaskyrgh kemenethek yw synsys wosa lies kudyn a vedhowysi y'n stret.

Kemeres rann a wra an gwerthjiow yn projekt a hwegh seythen... ha ny wra gwerthjiow servya tus mar tybons i dhe wul drogober a-wosa.

\*\*

Yma towl daswul curfew sewenyek Rysrudh.

Warlergh an kreslu, etek ha peswar ugens kansran a dus dhe Vre an Gew a garsa y synsi arta.

Gweythresow gorth-sosyel a godhas y'n hav pan esa towl gwitha yonkers a-ji y'n nos.

\*\*

Kowethas drehevel Rok a dherivas nans yw diw seythen i dhe drehi moy es tri hans oberwas y'ga sodhvaow Truru ha Karesk.

Lemmyn yma own a gelli peswar kans soodh moy a-hys Breten Veur.

\*\*

Derivas nowyth a lever bos possybyl palas leur an mor dhe Aberfal rag may fo gwrys porth downna.

Y fyinn pennrewloryon an porth dri moy a worholyon rag gul moy a vona rag an dre.

Byttegyns res yw dhedha y wul heb pystiga kyrhynieth Logh an Garrek.

\*\*

Gwerthjiow yw kachys gans an kreslu hag i ow kwertha sigarettys dhe fleghes.

Tus yowynk yn-dann etek bloodh veu danvenys a-ji dew-ugens gwerthji yn unn assaya prena tabako.

Moy es tressa rann anedha a werthas dhedha.

\*\*

Hag yth esa diskwedhys an kynsa gweyth, gwaynyer an Govyn Kernewek warlyna.

'Nebes Geryow a-dro Dhe'n SWF' veu diskwedhys orth Gool Fylm Kernow dy' Sul yw passyes dhe Aberfal.

Ordenoryon an goel a lever bos meur a dus tennis dhe weles lies fylm a-dro dhe Gernow, settys yn Kernow... po gwrys gans tus a Gernow.

\*\*

Rygbi...

Dydh brav o dy' Sadorn yw passyes dhe'gan parys rygbi.

Kenedhlek Onan... hag Eesher veu skwattyes yn fen gans an Vorladron... neb a waynyas nawnsek poynt, dhe dri.

Kenedhlek Dew... Bay an Menydh a dryhas erbynn Park Westcombe hwegh-poynt-warn-ugens dhe eth.

Rysrudh a waynyas aga degves fit yn unn rew... pymthek-warn-ugens dhe seytek erbynn Waterloo.

Ha dehweles dhe waynya a wrug an Para Oil Du pan warias erbynn Wharfedale.

An diwettha skorr o etek-poynt-warn-ugens dhe dheg.

\*\*

Ha henn yw oll rag nowodhow an seythen an seythen ma.

Goslowewgh orthiv arta an bennseythen a dheu der Radyo an Gernewegva.

Agas gweles!